




ՍԱՐԿԱՎԱԳԱԿԱՆ ԶԵՌՆԱԴՐՈՒԹՅՈՒՆ

Հունիսի 24-ին, կիրակի.—Սյսօր Մայր տաճարում, Սվազ ա. սեղանի վրա, ա. պատարագ մատուցեց Մայր Աթոռի դիվանապետ գերաշնորհ Տ. Ներսես արքեպս. Պողոսյանը: Պատարագի ընթացքում տեղի ունեցավ Ս. Էջմիածնի հոգևոր ճեմարանն ավարտած չորս ուսանողների սարկավագական ձեռնադրությունը՝ ձեռամբ պատարագիչ սրբազան հոր:

Ձեռնադրությունից հետո ոգեշունչ քարոզ խոսեց Տ. Ներսես արքեպս. Պողոսյանը:

ՆԵՐՍԵՍ ԱՐԷՊԻՍԿՈՊՈՍԻ ՔԱՐՈԶԸ
ՍԱՐԿԱՎԱԳԱԿԱՆ ԶԵՌՆԱԴՐՈՒԹՅԱՆ
ԱՌԹԻՎ

«Ես դենմ գձեռս ի վերայ տրա և դուք ամենեքեան աղօթս արարեք»: «Ես դնում եմ ձեռքս տրա (կոչեցյալի) վրա, և դուք բոլորդ աղոթեցեք» (Մաշտոց):

Սյսօր դուք բոլորդ ակամատես վկաները եղաք սարկավագական ձեռնադրության ստորագրության: Չորս երիտասարդներ՝ երկուսը Ամերիկայի Միացյալ Նահանգներից և մյուս երկուսը Հայաստանից, հագիվ քրան տարիքը բոլորած, կոչման գիտակցությամբ եկան ծնրադրելու Ս. Էջմիածնի սրբալույս խորանի առաջ և ստացան «աստ-

վածային և երկնավոր շնորհներ», կոչվելու համար ծառայության, իբրև համեատ սարկավագներ, Հայաստանյայց Եկեղեցու ծոցում ի Հայաստան և հայրուր:

Ձեռնադրության սուրբ խորհուրդը առաքելական դարերից մեզ ժառանգ հաւած սրբազան մի կարգ է: Ձեռնադրության միջոցով ենթական եպիսկոպոսի ձեռքից, որ առաքելական շնորհի շրթայի հաջորդական մեկ օղակն է, ստանում է հոգևոր և իմացական ուժ և Սուրբ Հոգու շնորհները: Հայաստանյայց առաքելահաստատ մեր Եկեղեցում առաքելականության շարունակությունը Ս. Թադևոսից և Ս. Բարթողիմեոսից հասել է մինչև Ս. Գրիգոր Լուսավորիչ և Ս. Գրիգոր Լուսավորչից էլ՝ մինչև մեր օրերը:

Սուրբ Գրիգոր Նարեկացին՝ հոգեգմայլ բանաստեղծը մեր Եկեղեցու, իր աղոթամատյանում Սուրբ Հոգուն դիմում է հետևյալ աղերսով. «Հերկի՛ր բանական անդատանները իմ այս մարմնեղեն կարծրացած սրտի, որ կարող լինի պտղաբերելու սերմը հոգևոր (ԼԴ)»: Ուրեմն Ս. Հոգին մեր մեջ սերմանում է հոգևոր սերմեր հատկապես ձեռնադրության պահին, որպեսզի մեր կյանքում դրանք պտղաբերեն:

Նույն աղոթքի ավարտին մենք Սուրբը հայցում է Սուրբ Հոգուց հետևյալը. «Ծնորհ

արա արդև և մեղավորիս, որ ես էլ խոսեմ համարձակությամբ. մեկնեմ կենսատու խորհուրդն ավետաց ավետարանիդ՝ արագաթիչ մտքի ընթացքով անցնելով անհուն ասպարեզները Բեզմով ներշնչված Կտակարանի»:

Այսօր ձեռնադրության այս խորհրդավոր պահին, մենք ևս իբրև տրուպը «աստվածային և երկնավոր շնորհներ» փոխանցողների, աղոթքով ու աղերսով եղանք միջնորդ, որ Ս. Հոգին իր բազմապատիկ շնորհներով իշնի ի վերուստ և օծտի հոգևոր ճեմարանի շրջանավարտ այս չորս երիտասարդ ասրկավագներին: Այս առթիվ խնդրեցինք, որ Ս. Հոգին շնորհի նրանց համարձակաձայն բարբառով, քարոզելու կարողությունը, համբերելու խոսեցնելու ուժը, լեզուներ խոսելու և աստվածային խորհուրդները մեկնաբանելու ընդունակությունը:

Այս պահին, արտանց շնորհավորում ենք չորս կոչեցյալներին Հայ Եկեղեցու նվիրատվության ատաշին աստիճանն ընդունելու առթիվ՝ մատթելով նրանց նոր եռանդ ու կորով, հարստության և հավատարմության ոգի, ծառայության և կոչումի գիտակցություն: Այս բոլորով սպասուգինված՝ նրանք բոլորանվեր արտով պիտի կարողանան օգտակար լինել մեր Եկեղեցուն, բարձր պահելով նրա սրբազան անունը ամենուր:

Սիրելի հավատացյալ քույրեր և եղբայրներ, դուք շատ լավ գիտեք, թե ներկա ժամանակներում Հայաստանյայց Եկեղեցին որքան կարիք ունի երիտասարդ, կրթված և գիտակից սպասավորների: Մեր Եկեղեցու համար կյանքի մի նոր շրջան սկսվեց, հոգևոր վերազարթնումի շնչով լի մի շրջան. վերջերս բազմաթիվ եկեղեցիներ վերաբացվեցին, աղոթքի մրմունջների հետ եկեղեցու զանգերի դողանջը վերստին լցրեց մեր աշխարհը, դպրոցներում մեր մատուղ սերունդը իր ուսումնական առօրյան սկսեց «Հայր մեր»-ով և սուրբ մկրտության միջոցով մեր աշխարհում հավատացյալների նվազող թիվը սկսեց վերանել, այսպիսով մենք բոլորս ակամատես վկաները դարձանք, պատմության հոյուփույթի միջոցով, մի նոր հրաշքի: Այդ հրաշքը անսպասելի վերադարձն է մարդկանց՝ դեպի հոգևոր արժեքները և դեպի Բրիստուն: Առանց գիտակից, զարգացած և նվիրված սպասավորների, բնական է, այս հրաշքը տեղի չէր ունենա, և որպեսզի այն իր վերջնական թափն ստանա, մենք այսօր ավելի քան երբեք պետք ունենք նոր ստասավորների:

Մեր պատմությունը վկայում է, որ առաքելական լույսը Ս. Գրիգոր Լուսավորչի հավատով էլ ավելի պայծառացած՝ դարերի դառն փորձությունների միջից անցնելով, առանց շիջանելու, ապահով հասել է մինչև մեր օրերը: Այսօր մեր պարտքն է տեսապես անշեշ պահել այն և փոխանցել գալիք սերունդներին, լինելով նաև լույսի մատուկներ մեր օրերում: Կա՝ արդյոք ավելի գեղեցիկ մի նպատակ, քան ծառայությունը լույսի, ճշմարտության, արդարության, սիրո և խաղաղության տարածման գործին:

Կրկին շնորհավորում եմ նորընծա մեր ասրկավագներին, շնորհավորում եմ նաև նրանց ծնողներին և ընտանեկան պարագաներին: Այս առթիվ հատկապես շնորհավորում եմ նորընծա ասրկավագների կնքահայր տեր և տիկին Տատուրյաններին, որոնք Միացյալ Նահանգներից հատուկ եկել էին ներկա լինելու համար այս ձեռնադրությանը:

Շնորհավորում եմ նաև ձեզ, սիրելի հավատացյալներ, որքան Հայաստանյայց Եկեղեցին պայծառ լինի, որքան նա ուժեղ լինի և ամուր հաստատված հայոց հողի վրա և հայրողիների արտի մեջ, այնքան մեր ժողովրդի ապագան պայծառ ու լուսավոր կլինի: Այս է վկայում Ս. Էջմիածնի և Հայ Եկեղեցու տասնչորս երկար դարերի պատմությունը:

Թող Սուրբ Հոգու շնորհները, որ վստահ ենք, առատապես բաշխվեցին ձեռնադրության պահին, իջնեն նաև բոլորիս վրա, մեզ հույս ու հավատ ներշնչեն այս դժվարին օրերին, խաղաղություն պարգևեն ողջ աշխարհին և մխիթարություն՝ բոլոր սգավոր հոգիներին:

«Օրհնություն ի բարձունս, ելողին ի Հօրե Հոգուն Սրբոյ, որով առաքեալքն արքեցան անմահական բաժական և հրաւիրեցին գերկիրս ի յերկինս», ամեն:

* *

Հրանտ արկ. Բարսեղյան. ծնվել է 1965 թ. մարտի 11-ին Իրանի Փերիա գավառի Հազարջրի գյուղում: 1968 թ. ընտանիքով հայրենադարձվել են Մայր Հայրենիք և բնակություն հաստատել Աշտարակ քաղաքում: 1972—82 թթ. սովորել և ավարտել է տեղի № 3 միջնակարգ դպրոցը: Եղել տարում ընդունվել է հոգևոր ճեմարան: 1983—85 թթ. ծառայել է խորհրդային բանակում, որից հետո շարունակել է ուսումը հոգևոր ճեմարանում: 1987 թ. ծա-

նայության է նշանակվել Օշականի Ս. Մաշտոց եկեղեցում:

*
*

Ալեքս սրկ. Գուգույան. ծնվել է 1964 թ. ապրիլի 7-ին ԱՄՆ-ի Նյու Ջերսի նահանգում: Նախնական կրթությունն ստացել է Բելմոնդ հայ սքուլ դպրոցում: 1982 թ. ավարտելով դպրոցը, ընդունվել է Բոստոնի համալսարանի իրավաբանական ֆակուլտետ և ավարտել 1986 թ.: Նույն թվականին ընդունվել է Բոստոնի համալսարանի ավելի բարձր իրավաբանական դպրոցը և մեկ տարի սովորելուց հետո, ժամանակավորապես թողել է ուսումը և մեկնել Մայր Աթոռ Ս. Էջմիածին՝ շարունակելու ուսումը հոգևոր ճեմարանում:

*
*

Հակոբ սրկ. Հակոբյան. ծնվել է 1959 թ. Հայաստանի Մարտունու շրջանի Արծվանիստ գյուղում: 1965—75 թթ. սովորել և ավարտել է տեղի միջնակարգ դպրոցը: 1979—81 թթ. ծառայել է Խորհրդային բանակում: 1983—84 թթ. ծառայել է Երևանի

Ս. Սարգիս եկեղեցում: 1984 թ. ընդունվել է հոգևոր ճեմարան: 1989 թ. ծառայության է նշանակվել Սպիտակի Ս. Հարություն եկեղեցում:

*
*

Արեմ-Սարգիս սրկ. Ծերեճյան. ծնվել է 1966 թ. ԱՄՆ-ի Դետրոյտ քաղաքում: Նախնական կրթությունն ստացել է Մասաչուսեթս նահանգի Սպրինգֆիլդ քաղաքում, ապա Ֆլորիդա նահանգի Ֆոր Լաթորիլ քաղաքում: 1984—88 թթ. սովորել և ավարտել է Ֆլորիդայի Ս. Թոմաս համալսարանի կրոնական բաժինը: Սովորելու ընթացքում ծառայել է տեղի Ս. Դավիթ հայկական եկեղեցում: 1985—88 թթ. ամառային դասընթացների ժամանակ դասավանդել է Նյու Յորքի Ս. Ներսես ընծայարանում: 1989 թ. ընդունվել է Ս. Էջմիածնի հոգևոր ճեմարան:

*
*

«Էջմիածին» ամսագրի խմբագրությունը շնորհավորում է նորընծա սարկավագներին, մաղթելով նոր ձեռքբերումներ իրենց հետագա կրթական ասպարեզում և անմնացորդ ծառայություն Հայաստանյայց Առաքելական Եկեղեցուն և հայ ժողովրդին:

